

**Po'ema para I Inacha'igen 2020
Tinige' Siñora Teresita Concepcion Flores**

**I Fino' CHamoru'
I Hila' Nãna u Su'on Hit Mo'na
Fino' i taotao tãno', I ManCHamoru
Fino' i korason, fino' i hinasso.**

**Ginen i hila'nãna na mana'atungo' hit,
mana'akuentusi hit yan a'annok manhãyi hit.
Maila ta fanachu, ta fanohge ya ta fanhita
gi i lina'lã' nu i sumen empottãnte na u ta petsigi
i kinalamten i fino' i korason, i hinasso gi hinanao-ta.**

**I Fino' CHamoru, i hila' nãna u su'on hit mo'na.
Ta fanestoria, ta fanadingan, ta fanngãtan
ya ta fanmangguifi gi i fino'-ta i fino' CHamoru.
Ta usa gi todû maseha amãnu guatu, ta attituyi
ya u ma hungok, ya u ma tungo', yan u ma respetu.**

**Maila ta fanachu, fanohge, ta fanhita! Ya ta difende i diricho-ta
Kumu manaotao tãno' hit ya ta su'on mo'na i hila' nãna
i gatbon i sunidu yan i na'magof na tunãda ni' humuhuyong.
Ta tuge' ya u ma li'e', u ma taitai, u ma komprende yan u ma agradesi
i pã'a' i lina'la', i espiritu yan i anten i taotao tãno' i ManCHamoru.**

**Mungnga na ta fanmaleffa hãyi hit, ginen manu hit mãgi, yan para amãnu hit
guatu. Ta gosa i minagof, inafa'maolek, respetu yan guinaiya. Tãnom i korason
kottura para i fama'gu'on-ta, sa' fiet i fino'-ta gi todû i kinalamten-ta. Ta hãtsa i
banderan i diricho-ta, ta tulos i galaide' gi todû i tano' ya u taichi. Pues nihi todû
ya ta fanohge, ta fanachu ta fanhita ya u ta su'on mo'na i hila' nãna!**